

Revisiun urgenta e necessaria

Refurma da la Cassa da pensiun dal chantun Grischun

MARTIN CABALZAR/FMR

■ **Cun la Cassa da pensiun dal Grischun vai actualmain excellent. Per dentant garantir era en l'avegnir l'equiliber finanziel e la cumpetitivitad necessaria è ina refurma urgenta e necessaria.** Cun ina facultad da 3.3 milliardas, ina rendita da 6.4% ed in grad da garanzia da 109.8% (+ 6%) è la Cassa da pensiun chantunala en ina situaziun confortabla. La Cassa dispona plinavant da reservas per fluctuaziuns da valur da total 295 milliuns. «Quai malgrà che la pandemia da corona ha cupitgà il mund entir en ina recessiun che ha effectua e pretendì interenziuns enormas tar la bursa, las bancas e las regenzas», constatescha il directur Andrea Seifert cun satisfaziun. La CPGR haja pudì garantir nuninterruttamain ses manaschi ed ademplir cumplainamain ed en la qualitad usitada tut ses servetschs e sias incumbensas. Fitg bass èn er ils custs d'administraziun cun 122 francs per persuna, la mesadad da la media svizra. Tar la cassa da pensiun chantunala èn assicurads actualmain 12450 persunas da 47 patrums da lavur, tranter quels er dus terzs da las vischnancas grischunas.

Ina refurma è tuttina necessaria

L'autezza da las rentas dependa la finala da la summa pajada en la cassa da pensiun e da la tariffa da conversiun. Er sche la situaziun finanziala da la Cassa da pensiun chantunala è actualmain fitg solida è ina refurma tuttina urgenta e necessaria. Quai conferma er cusseglier guvernativ Christian Rathgeb: «Las aspectativas da vita creschentas ed il bass nivel dals tschains han effectua che la tariffa da conversiun (Umwandlungssatz) na po betg pli vegnir finanziada cun la rendita da la facultad da la cassa.» Ina revisiun s'imponi dentant er pervi da la revisiun da la lescha federala e per restar cumpetitiva cun autras cassas publicas, punctuescha Rathgeb. La Regenza ha per



Cusseglier guvernativ Christian Rathgeb (da san.) ed il directur da la Cassa da pensiun chantunala Andrea Seifert èn satisfatgs da l'andament da la cassa. FOTO CASSA DA PENSIUN CHANTUNALA.

«Da quest midada profitan cunzunt persunas che lavuran parzialmain ed ella lubescha a patrums ed emploiads d'adattar a moda flexibla lur engaschament als basegns effectivs.»

Christian Rathgeb,
cusseglier guvernativ

quest motiv preparà ina revisiun che porta dapli flexibilitad e miglierescha las prestaziuns en la vegliadetgna ed en cas d'invaliditad e mortori. Previs è er da sbassar il grad d'occupaziun che vegn res-

guardà per la summa da coordinaziun tar la paja. Questa mesira ha per consequenza che la summa da paja e las contribuziuns da spargn creschan, uschia che la cassa po er meglierar sias prestaziuns tar

las rentas. «Da quest midada profitan cunzunt persunas che lavuran parzialmain ed ella lubescha a patrums ed emploiads d'adattar a moda flexibla lur engaschament als basegns effectivs», di Rathgeb. L'attractivitat e las prestaziuns da la cassa da pensiun saja savens er in criteri decisiv tar la recrutaziun da personal. Da quai profiteschian la finala tant chantun, vischnancas ed autras instituziuns sco er ils singuls emploiads e la magistraglia, è Rathgeb persuadi. La Regenza prepara in messadi correspondent che vegn probabelmain a vegnir tractà dal Cussegl grond en la sessiun d'avust e mess en vigor cun l'entschatta da 2022.

La soluziun transitorica

Per impedir in spustament da grevezzas e la redistribuziun da la facultad da la cassa dals pensiunads sin la generaziun activa ha la cumissiun administrativa prendì mesiras tecnicas che èn gia entradas en vigor. Senza questas mesiras transitoricas avessan cunzunt persunas che èn curt avant la pensiun stui quintar cun sperditas da fin 20% da lur rentas. Per mitigiar la situaziun da las persunas che van ils proxims 10 onns en pensiun vegn la tariffa da conversiun perquai adattada successivamain cun ina soluziun da splitting che garantisce il mantegniment dal possess actual (Besitzstandwahrung). «Questa soluziun transitorica è faira, perquai ch'ella garantisce in tractament egual da tut ils assicurads independentamain da lur vegliadetgna», punctuescha Andrea Seifert. Tut en tut vegn questa soluziun transitorica a custar radund 100 milliuns francs. Questa summa po dentant vegnir curclada entiramain tras las reservas accumuladas che muntan actualmain a 295 milliuns. «Las mesiras transitoricas na vegnan pia betg ad engrevgiar supplementarmain ni il chantun ni las vischnancas ni ils assicurads sez», sincerescha il directur Andrea Seifert vers la FMR.